



REPUBLIKA E SHQIPËRISË
AUTORITETI I MEDIAVE AUDIOVIZIVE

Nr. 1451/₁₃ prot.

Tiranë, më 26.04.2024

VENDIM

NR. 40, DATË 26.04.2024

PËR
MIRATIMIN E RREGULLORES “PËR KRITERET DHE PROCEDURAT E
SHQYRTIMIT TË NDRYSHIMEVE NË STRUKTURËN E PRONËSISË
DHE TRANSPARENCËN E TË DHËNAVE TË LIDHURA ME PRONËSINË E
OSHMA-VE”

Në mbështetje të nenit 19, pika 1 germa “e” dhe 16, si dhe nenit 65, të ligjit nr. 97/2013, datë 19.03.2013 “Për mediat audiovizive në Republikën e Shqipërisë”, i ndryshuar, Autoriteti i Mediave Audiovizive,

VENDOSI:

1. Miratimin e rregullores “Për kriteret dhe procedurat e shqyrtimit të ndryshimeve në strukturën e pronësisë dhe transparencën e të dhënave të lidhura me pronësinë e OSHMA-ve”, sipas tekstit që i bashkëlidhet këtij vendimi.
2. Ngarkohet administrata e AMA-s për zbatimin e këtij vendimi.

Ky vendim hyn në fuqi menjëherë.

Kryetar:	Armela	KRASNIQI
Zëvendëskryetar:	Desada	METAJ
Anëtarë:	Aurela	BICJA (në mungesë)
	Besian	ZOGAJ
	Gjergji	HAMITI
	Jetmir	HALILAJ
	Joana	ALLUSHI



REPUBLIKA E SHQIPËRISË
AUTORITETI I MEDIAVE AUDIOVIZIVE

RREGULLORE

PËR

“PËR KRITERET DHE PROCEDURAT E SHQYRTIMIT TË NDRYSHIMEVE NË STRUKTURËN E PRONËSISË DHE TRANSPARENCËN E TË DHËNAVE TË LIDHURA ME PRONËSINË E OSHMA-VE”

**KREU I
DISPOZITA TË PËRGJITHSHME**

**Neni 1
Baza ligjore**

1. Kjo rregullore hartohet në zbatim të nenit 32.1/1, 62, 74, të Ligjit nr. 97/2013, datë 19.03.2013 “Për mediat audiovizive në Republikën e Shqipërisë”, i ndryshuar,
2. Kjo rregullore del në përputhje me dispozitat e Ligjit nr. 44/2015, datë 30.4.2015 “Kodi i Procedurave Administrative”, ligjit nr. 9121, datë 28.07.2003 “Për mbrojtjen e konkurrencës”, të ndryshuar, Ligjit nr. 112/2020, datë 29.07.2020 “Për regjistrin e pronarëve përfitues”, të ndryshuar dhe Ligjit nr. 9901, datë 14.04.2008 “Për tregtarët dhe shoqëritë tregtare”.

**Neni 2
Objekti**

1. Objekt i kësaj rregulloreje është përcaktimi i rregullave, kriterëve dhe procedurave për:
 - a) Shqyrtimin e ndryshimeve të ndodhura në strukturën pronësore brenda të njëjtit person juridik OSHMA privat dhe fizik mbajtës i licencës ose i autorizimit lëshuar nga AMA, të cilat nuk passjellin cedimin ose kalimin e të drejtave që burojnë nga licenca ose autorizimi.
 - b) Shqyrtimin e ndryshimeve në strukturën pronësore mes personave juridikë dhe fizik privatë OSHMA, në rastet e hyrjes në marrëdhënie juridike civile të cilat passjellin cedimin ose kalimin e të drejtave që burojnë nga licenca ose autorizimi.
 - c) Deklarimin e informacionit mbi përbërjen e strukturës së pronësisë të personit juridik OSHMA mbajtës i licencës ose i autorizimit nga AMA, duke përfshirë

- edhe pronarin përfitues për efekt të transparencës të kontrolluesit të fundit të personit juridik.
2. Dispozitat e kësaj rregulloreje nuk zbatohen për transmetuesin publik shqiptar (RTSH).
 3. Kjo rregullore do të zbatohet në të gjitha rastet kur një OSHMA ndryshon strukturën e pronësisë.

Neni 3 Përkufizime

Në këtë rregullore, termat e mëposhtëm kanë këto kuptime:

1. "AMA" është Autoriteti i Mediave Audiovizive, autoriteti rregullator në fushën e shërbimeve të transmetimeve audio dhe audiovizive dhe shërbimeve të tjera mbështetëse në territorin e Republikës së Shqipërisë.
2. "Person juridik privat" janë subjektet raportuese nën juridiksionin e Republikës së Shqipërisë të regjistruar në QKB në një nga format si më poshtë:
 - a) shoqëritë më përgjegjësi të kufizuar;
 - b) shoqëritë aksionare;
 - c) shoqëritë kolektive;
 - ç) shoqëritë komandite;
 - d) zyrat e përfaqësimit dhe degët e shoqërive të huaja;
 - e) çdo subjekt tjetër juridik, i cili me ligj detyrohet të regjistrohet pranë QKB-së;
 - f) organizatat jofitimprurëse, ku përfshihen fondacionet, shoqatat, qendrat, si dhe degët e organizatave jofitimprurëse të huaja, të regjistruara në regjistrin e organizatave jofitimprurëse në Republikën e Shqipërisë;
 - g) personat juridikë dhe ndërmarrjet, aksionarët e të cilëve, përveç institucioneve qendrore dhe/ose vendore të Republikës së Shqipërisë, janë edhe persona fizikë/persona juridikë të tjerë shqiptarë dhe/ose të huaj.
3. "Ofrues shërbimi mediatik audioviziv (OSHMA)" është personi fizik ose juridik, që ka përgjegjësinë editoriale për zgjedhjen e përmbajtjes së shërbimeve të transmetimit audioviziv dhe që vendos mënyrën e organizimit të saj.
4. Rregullimi i pronësisë së një OSHMA-je kryhet sipas përcaktimeve të nenit 62, të ligjit nr. 97/2013, datë 19.03.2013 "Për mediat audiovizive në Republikën e Shqipërisë", i ndryshuar, ku përcaktohet përqindja e pronësisë së aksionerëve/ortakëve pjesëmarrës në kapital.
5. "Pronar përfitues" është personi fizik i cili ka në pronësi ose kontrollon i fundit personin juridik OSHMA, në emër të të cilit po kryhet një transaksion ose veprimtari dhe përfshin të paktën:
 - a) Personin fizik, i cili ka në pronësi ose kontrollon i fundit një person juridik, përmes pronësisë direkte ose indirekte të një përqindje të mjaftueshme të aksioneve/kutoave ose të drejtave të votimit ose të pjesëmarrjen në kapitalin e atij personi juridik, përfshirë përmes mbajtjes së aksioneve, ose përmes kontrollit nëpërmjet mjeteve të tjera, ose përfiton nga transaksionet e kryera nga personi juridik në emër të tij.
 - b) Themeluesin ose administratorin, ose personin fizik që ushtron kontrollin e fundit efektiv në administrimin dhe kontrollin e organizatave jofitimprurëse, ku përfshihen fondacionet, shoqatat, qendrat, si dhe degët e organizatave jofitimprurëse.

6. “Pronësi direkte” është pronësia e mbajtur nga një person fizik ose juridik, me 25% ose më tepër mbi pjesëmarrjen me aksione/kuota të kapitalit ose të interesave pronësore, në një person juridik OSHMA që:
- a) është licencuar për ofrimin e transmetimeve audio/audiovizive,
 - b) është autorizuar për ofrimin e shërbimeve të programit audio dhe/ose ofrimin e shërbimit të programit audioviziv të mbështetur në rrjet satelitor.
- 6.1. Pronësi direkte do të konsiderohet edhe pronësia e mbajtur nga një person fizik ose juridik nëpërmjet çdo aksioni/kuote të kapitalit ose të interesave të pronësisë në një person juridik OSHMA, mbajtës të çdo lloji autorizimi të parashikuar nga ligji nr. 97/2013, i ndryshuar.
7. “Pronësi indirekte” është pronësia e mbajtur ose kontrolli i ushtruar nga një ose më shumë persona fizikë, në një ose më shumë persona juridikë OSHMA, që:
- a) është/janë licencuar për ofrimin e transmetimeve audio/audiovizive,
 - b) është/janë autorizuar për ofrimin e shërbimeve të programit audio dhe/ose ofrimin e shërbimit të programit audioviziv të mbështetur në rrjet satelitor dhe i cili/të cilët veçmas ose së bashku zotërojnë 25% ose më tepër aksione/kuota të kapitalit ose të interesave të pronësisë, në një person juridik OSHMA.
- 7.1. Pronësi indirekte do të konsiderohet edhe pronësia e mbajtur ose kontrolli i ushtruar nga një nga një ose më shumë persona fizikë, në një ose më shumë persona juridikë OSHMA, mbajtës të çdo lloji autorizimi të parashikuar nga ligji nr. 97/2013, i ndryshuar.
8. “Regjistri i Pronësisë së OSHMA-ve” është një bazë të dhënash elektronike e administruar dhe publikuar prej AMA-s, në të cilën regjistrohen të dhënat e deklaruara mbi strukturën pronësore sipas Ligjit nr. 97/2013, datë 19.03.2013 “Për mediat audiovizive në Republikën e Shqipërisë”, i ndryshuar dhe pronësinë përfituese të tyre, me qëllim sigurimin e transparencës sa i takon pronësisë së shoqërive mediatike audio dhe audiovizive.
9. “Shërbim programi audioviziv” është një tërësi programesh audiovizive të çdo lloji dhe që përhapet ose shpërndahet drejtpërdrejt ose jo për marrjen nga publiku i gjerë.

KREU II DETYRIMET E SUBJEKTEVE PËR NJOFTIM TË NDRYSHIMIT TË STRUKTURËS PRONËSORE

Neni 4

Të drejtat dhe detyrimet e ofruesve të shërbimeve mediatike audio/audiovizive

1. Ofruesit e shërbimeve mediatike audio/audiovizive në Republikën e Shqipërisë kanë të drejtë të ushtrojnë veprimtarinë e tyre ekonomike pa pengesa, përfshirë kryerjen e ndryshimeve në strukturën pronësore të personit juridik të tyre, në përputhje me legjislacionin shqiptar në fuqi për mediat audiovizive.
2. AMA e respekton lirinë editoriale të OSHMA-ve dhe nuk ushtron inspektime në mjediset fizike të zyrave të OSHMA-ve dhe ato private, ose, nëse është e zbatueshme, ndaj anëtarëve të familjes së tyre, punonjësit e tyre ose anëtarët e familjes së punonjësve të tyre, me arsyetimin se ata refuzojnë të zbulojnë informacion mbi ndryshimet e ndodhura në strukturën pronësore.
3. Pavarësisht specifikimit të pikës 2 të këtij neni, AMA ka të drejtë të monitorojë kryesisht dhe në mënyrë periodike në Regjistrin e QKB-së mbi çdo ndryshim të ndodhur në strukturën

pronësore apo në të dhëna të tjera të licencës/autorizimit të OSHMA-së. Në rast evidentimi të ndryshimeve në të dhënat e licencës/autorizimit për të cilat nuk është njoftuar Autoriteti, sipas procedurës dhe afatit në nenin 6 të kësaj rregulloreje, zbatohen parashikimet e nenit 9 të saj.

Neni 5 Kriteret dhe dokumentacioni

Faqe | 5

1. Subjekti person fizik ose juridik (OSHMA) që ka kryer ndryshime në strukturën e pronësisë, ose në rastin e bashkimit të dy ose më shumë personave juridikë, ku të paktën njëri prej tyre është OSHMA, personi i autorizuar për përfaqësim i secilit subjekt, duhet të paraqesë në AMA:

A. Njoftim me shkrim për ndryshimin e strukturës pronësore, ku të deklarohet se transaksioni nuk është në kundërshtim me dispozitat e ligjit nr. 97/2013 “Për mediat Audiovizive në Republikën e Shqipërisë”, i ndryshuar.

B. Të dhëna që rezultojnë nga ndryshimet e bëra të pronësisë të OSHMA-së, ku të përfshihen:

1. Të dhëna për personat fizikë dhe/ose juridikë që largohen nga struktura e pronësisë së OSHMA-së:

- i. Ekstraktin e Thjeshtë dhe Historik të Regjistrimit Tregtar, për të dhënat e shoqërisë, ku të reflektohet emri/emrat e personave fizikë ose emri tregtar (nëse largohet person juridik);
- ii. Selia (nëse largohet person juridik);
- iii. Numri Unik Identifikues (në rast se largohet person fizik);
- iv. Përqindja e kuotave/aksioneve e larguar nga kapitali.

2. Të dhënat për personat fizikë dhe/ose juridikë që i bashkohen strukturës së pronësisë së OSHMA-së:

- i. Ekstraktin e Thjeshtë dhe Historik të Regjistrimit Tregtar, për të dhënat e shoqërisë, ku të reflektohet emri/emrat e personave fizikë ose emri tregtar (nëse anëtarësohet një person juridik), jo më vonë se 30 ditë nga data e lëshimit;
- ii. NIPT-i (në rastin e anëtarësimit të personit juridik ortak/aksionar i ri);
- iii. Selia (nëse anëtarësohet person juridik si aksionar/ortak i ri);
- iv. Pjesëmarrja e ndryshuar në kapitalin e OSHMA-së, në rast të anëtarësimit të një personi fizik.

Nëse struktura e re pronësore shtohet me persona juridikë, deklarohet:

- i. emri tregtar;
- ii. selia;
- iii. NIPT-i i personit juridik;
- iv. Ortak/aksionar i ri;
- v. Pjesëmarrja e re e personit juridik në kapitalin e OSHMA-së;
- vi. Emri/emrat e pronarëve përfitues (person fizik) ortak/aksionar në personin juridik të ri aksionar/ortak;
- vii. Numri Unik Identifikues i secilit pronar përfitues;
- viii. Pjesëmarrja e plotë e pronarëve përfitues në kapitalin themelor të personit juridik.

3. Kontratë shitje të kuotave/aksioneve, kontratë dhurimi, ose çdo dokument tjetër që vërteton kalimin e pronësisë të pala blerëse (pa përfshirë informacion konfidencial), kopje e njëzuar me origjinalin.
4. Nëse një person juridik i huaj i bashkohet strukturës së pronësisë së subjektit, transmetuesi OSHMA është i detyruar të paraqesë një dokument për regjistrimin e këtij personi juridik në regjistrin përkatës të vendit të regjistrimit, i cili mund të japë informacion mbi strukturën pronësore dhe administratorin, jo më vonë se 3 muaj nga data e lëshimit, në origjinal dhe të përkthyer në gjuhën shqipe nga përkthyes i autorizuar ligjor.

C. Të dhëna mbi përputhshmërinë ligjore dhe financiare:

- a. *Në rastet e shitblerjes së kuotave/aksioneve mbi 25% deri në 50% të pjesëmarrjes në kapitalin e personit juridik të licencuar ose të autorizuar si OSHMA, pala blerëse duhet të deklarojë në AMA:*
 - i. Origjinën e burimeve financiare për kryerjen e transaksionit, që të vërtetuara përkojnë me periudhën e kryerjes së transaksionit tregtar për kalimin e kuotave;
 - ii. Vërtetim të gjendjes gjyqësore të aksionarëve/ortakëve të OSHMA-së, jo më vonë se 3 muaj nga data e lëshimit;
 - iii. Vërtetim të gjendjes gjyqësore të personit juridik OSHMA, jo më vonë se 3 muaj nga data e lëshimit;
 - iv. Strukturën e Bordit Drejtues (nëse struktura e bordit aktual ka ndryshime);
 - v. Curriculum Vitae të personit juridik OSHMA.
- b. *Në rastet e shitblerjes së kuotave/aksioneve në më shumë se 51% të kapitalit të personit juridik të licencuar ose të autorizuar si OSHMA, ose të bashkimit me përthithje të dy ose më shumë personave juridikë OSHMA, ose të cedimit të drejtave që rrjedhin nga licenca/autorizimi, pala blerëse duhet të deklarojë në AMA:*
 - i. Origjinën e burimeve financiare për kryerjen e transaksionit, që të vërtetuara përkojnë me periudhën e kryerjes së transaksionit tregtar për kalimin e kuotave;
 - ii. Vërtetim të gjendjes gjyqësore të aksionarëve/ortakëve të OSHMA-së, jo më vonë se 3 muaj nga data e lëshimit;
 - iii. Vërtetim të gjendjes gjyqësore të personit juridik OSHMA, jo më vonë se 3 muaj nga data e lëshimit;
 - iv. Strukturën e Bordit të ri Drejtues (nëse struktura e bordit aktual ka ndryshime);
 - v. Curriculum Vitae të personit juridik OSHMA.

D. Të dhëna të tjera:

1. Në të gjitha rastet e ndryshimit të strukturës pronësore, pala blerëse deklaron nëse ka lidhje apo konflikt interesi të drejtpërdrejtë ose të tërthortë në organizata të tjera ose shoqëri private, në rastet e ushtrimit të veprimtarisë audiovizive.
2. Në rastet të cilat sjellin për pasojë ndryshimin tërësor të strukturës pronësore të personit juridik licencuar/autorizuar si OSHMA, pala blerëse duhet të deklarojë në AMA ndryshimet në objektin e veprimtarisë së personit të ri juridik OSHMA, ku të reflektohet si objekt ekskluziv ushtrimi i veprimtarisë audio/audiovizive.
3. Dokumentacioni i përcaktuar në pikën 1 të këtij neni, depozitohet origjinal ose i njëzuar me origjinalin dhe nuk i kthehet aplikuesit pas dorëzimit të tij në

institucion. Dorëzimi mund të kryhet nëpërmjet postës ose dorazi, në zyrën e protokollit të AMA-s.

4. Administratori i personit juridik OSHMA, që ka kryer ndryshime në strukturën e pronësisë, ose në rastin e bashkimit të dy ose më shumë personave juridikë, ku të paktën njëri prej tyre është OSHMA, administratori i secilit person juridik dorëzon edhe formularin e veçantë të aplikimit të plotësuar dhe nënshkruar sipas Shtojcës nr. 1, së bashku me dokumentacionin shoqërues së pikës 1 të këtij neni.
5. Formulari i aplikimit është pjesë përbërëse e dokumentacionit të aplikimit dhe mund të shkarkohet nga aplikuesi në faqen zyrtare në internet të AMA-s, ose mund të tërhiqet pa pagesë pranë zyrave të AMA-s. AMA miraton përmbajtjen dhe formën e formularëve të aplikimit, sipas Shtojcës bashkëlidhur kësaj rregulloreje.

Neni 6

Afati i kryerjes së njoftimit mbi ndryshimet në pronësi dhe pagesa

1. Subjektet, në zbatim të Ligjit nr. 97/2013 “Për mediat audiovizive në Republikën e Shqipërisë”, të ndryshuar, janë të detyruar që njoftimin për ndryshimin e strukturës pronësore t’a dorëzojnë pranë Autoritetit të Mediave Audiovizive jo më vonë se 30 ditë nga data e kryerjes së ndryshimeve, së bashku me dokumentacionin shoqërues sipas nenit 5.
2. Pagesa për përpunimin e dokumentacionit (PPD) për ndryshimet në pronësi kryhet sipas parashikimeve të rregullores në fuqi për pagesat për licencë ose autorizim dhe shërbimet që kryhen nga AMA, brenda 3 ditëve pune nga momenti i depozitimit të aplikimit në institucion dhe tërheqjes së faturës.

KREU III

PROCEDURA E SHQYRTIMIT DHE VENDIMMARRJES

Neni 7

Procedura e shqyrtimit të aplikimit

1. Kërkesat për ndryshime të strukturës pronësore administrohen nga Drejtoria Ligjore dhe Drejtoria e Financës dhe Shërbimeve dhe merren në shqyrtim vetëm dosjet e aplikimit që rezultojnë të mbyllura dhe të vulosura. Drejtoria e Financës dhe Shërbimeve verifikon nëse subjekti ka kryer pagesën përkatëse dhe në rast se subjekti nuk ka kryer pagesën, dosja e aplikimit të tij nuk i nënshtrohet shqyrtimit dhe arkivohet.
2. Pas verifikimeve të kushteve të pikës 1 të këtij neni, secila drejtori verifikon dhe shqyrton sipas fushës së përgjegjësisë, përputhshmërinë e dokumentacionit të depozituar nga subjekti dhe në rast mangësish kërkon nga subjekti plotësimin e dokumentacionit, brenda një afati të arsyeshëm 15 ditor.
3. Në rast të mosrepektimit të këtij afati, Drejtoria Ligjore dhe Drejtoria e Financës dhe Shërbimeve i propozojnë AMA-s rrezimin e kërkesës për miratimin e ndryshimeve në strukturën pronësore.
4. Aplikimi i subjektit, dokumentacioni i të cilit rezulton në përputhje me kërkesat e kësaj rregulloreje, Drejtoria Ligjore dhe Drejtoria e Financës dhe Shërbimeve

përgatisin relacionin dhe projekvendimin përkatëse që i përcillet AMA-s për vendimimarrje.

5. Nëse AMA nuk e miraton kalimin për shkaqe të parashikuara në ligj, aplikuesi njofton brenda 15 ditëve QKB-në për refuzimin e miratimit të ndryshimeve në strukturën pronësore dhe kërkon rikthimin e pjesëmarrjes në kapital në gjendjen e mëparshme.

KREU IV DEKLARIMI I PRONËSISË, PRONARIT PËRFITUES DHE SANKSIONET NË RASTE MOSDEKLARIMI

Neni 8

Publikimi i strukturës pronësore në Regjistrin e Pronësisë së OSHMA-ve

1. Ofruesit e shërbimeve mediatike audiovizive bëjnë publik informacionin në lidhje me strukturën e tyre të pronësisë, duke përfshirë edhe pronarët përfitues.
2. AMA administron, publikon dhe përditëson Regjistrin e Pronësisë së OSHMA-ve në faqen zyrtare të Autoritetit, bazuar në të dhënat e deklaruara nga OSHMA-ja.
3. Regjistri përmban:
 - a. Të dhëna mbi emrin e personit juridik OSHMA;
 - b. Llojin dhe statusin e personit juridik OSHMA;
 - c. Periudhën e marrjes/rinovimit të licencës ose autorizimit në AMA;
 - d. Emrat, detajet dhe përqindja e pronësisë së aksionarëve/ortakëve pjesëmarrës në kapital;
 - e. Emrat, detajet dhe përqindja e pronësisë së pronarëve përfitues;
 - f. Llojin e pronësisë së pronarëve përfitues (direkte ose indirekte).
4. AMA ka të drejtë të kërkojë informacion nga QKB-ja apo institucione të tjera publike përgjegjëse, në rastet kur të dhënat e regjistruara në Regjistër nuk përputhen me të dhënat në posedim të institucioneve në fjalë.
5. Nëse AMA konstaton se të dhënat e regjistruara në Regjistër nuk përputhen me të dhënat e publikuara në Regjistrin e Pronarëve Përfitues të QKB-së, atëherë:
 - a) AMA njofton personin juridik ose fizik OSHMA dhe Qendrën Kombëtare të Biznesit;
 - b) Personi juridik ose fizik brenda 15 ditëve nga data e njoftimit të AMA-s duhet të deklarojë të dhënat e sakta për strukturën pronësore dhe pronarët përfitues, sipas ligjit nr. 97/2013, i ndryshuar;
6. Krahas pikës 2, AMA publikon informacion mbi strukturën e pronësisë së kompanisë dhe aksionarëve të saj, përfshirë pronarët përfitues, çdo gjashtë muaj, edhe në Buletinin periodik të Autoritetit.

Neni 9 Gjobat

1. Mungesa e njoftimit në AMA nga OSHMA-ja e licencuar/autorizuar për ndryshimet në strukturën pronësore, brenda afatit prej 30 ditësh nga data e kryerjes së ndryshimeve, përbëjnë kundërvajtje administrative dhe dënohen me gjobë nga 120 000 deri në 2 000 000 lekë.
2. Gjoba vendoset nga AMA kryesisht.

KREU V
BASHKËPUNIMI ME PALË TË TRETA PËR SIGURIMIN E TRANSPARENCËS
SË PRONËSISË NË TREGUN AUDIO/AUDIOVIZIV

Faqe | 9

Neni 10

Bashkëpunimi me Autoritetin e Konkurrencës

1. AMA mund të kërkojë bashkëpunim ose ndihmë të ndërsjellë me Autoritetin e Konkurrencës, për qëllime të shkëmbimit të informacionit ose marrjen e masave të rëndësishme, për zbatimin e qëndrueshëm dhe efektiv të kësaj rregulloreje.
2. Nëse AMA gjykon se ekziston një rrezik serioz dhe i rëndë që cënon funksionimin e tregut të brendshëm për shërbimet e medias audiovizive, mund t'i kërkojë autoriteteve ose organeve të tjera rregullatore kombëtare të ofrojnë bashkëpunim të ndërsjellë, duke siguruar njëkohësisht respektimin e të drejtave themelore, në veçanti lirinë e shprehjes.
3. Kërkesat për bashkëpunim të ndërsjellë, përfshirë bashkëpunimin e përsheptuar ose ndihmën e ndërsjellë, përmbajnë të gjithë informacionin e nevojshëm, së bashku me qëllimin dhe arsyet për të.

Neni 11

Bashkëpunimi me autoritetet homologe evropiane rregullatore

AMA mund të shkëmbejë eksperiencën dhe praktikat më të mira me autoritetet homologe të shteteve të tjera, me platformën evropiane të autoriteteve rregullatore (EPRA) dhe me grupin e rregullatorëve evropianë për shërbimet mediatike audiovizive (ERGA) në kuadër të zbatimit të dispozitave të kësaj rregulloreje.

Neni 12

Hyrja në fuqi

1. Kjo rregullore hyn në fuqi menjëherë pas miratimit të saj nga Autoriteti i Mediave Audiovizive (AMA).
2. Kjo rregullore publikohet në faqen zyrtare të internetit të Autoritetit të Mediave Audiovizive.

Shtojcë nr. 1
Formular aplikimi

NJOFTIMI PËR NDRYSHIM TË STRUKTURËS SË PRONËSISË:

Pala

kërkuese:

Faqe | 10

(emri i plotë i OSHMA-së)

NIPT (numri i identifikueshëm): _____
Adresa dhe selia e regjistruar: _____

Kontakt: _____

**GJENDJA AKTUALE E STRUKTURËS SË PRONËSISË PËRPARA
NDRYSHIMIT:**

Emër, _____ mbiemër/emër
tregtar _____
NIPT _____
Adresa dhe selia e regjistruar: _____

Lloji i ortakut/aksionarit: Person Fizik Person Juridik

Pjesëmarrja në kapitalin e OSHMA-së: 1) _____ (në %)
2) _____ (në %)
3) _____ (në %)

NDRYSHIMI I PLANIFIKUAR I STRUKTURËS SË PRONËSISË:

Pala e larguar:

Emër, _____ mbiemër/emër
tregtar _____
NIPT _____
Adresa dhe selia e regjistruar: _____

Lloji i ortakut/aksionarit të loarguar: Person Fizik Person Juridik

Pjesëmarrja e larguar nga kapitali i OSHMA-së: 1) _____ (në %)
2) _____ (në %)
3) _____ (në %)

Pala e re pjesëmarrëse:

Emër, _____ mbiemër/emër
tregtar _____
NIPT _____
Adresa dhe selia e regjistruar: _____

Lloji i ortakut/aksionarit të ri: Person Fizik Person Juridik

Faqe | 11

Pjesëmarrja e re në kapitalin e OSHMA-së: 1) _____ (në %)
2) _____ (në %)
3) _____ (në %)

Mënyra e transferimit të pronësisë: Shitblerje Dhurim Tjetër (Lutemi
specifikoni: _____)

STRUKTURA E PRONËSISË QË REZULTON NGA NDRYSHIMI I KËRKUAR:

Emër, _____ mbiemër/emër
tregtar _____
NIPT _____
Adresa dhe selia e regjistruar: _____

Pjesëmarrja në kapitalin e OSHMA-së: 1) _____ (në %)
2) _____ (në %)
3) _____ (në %)

TË DHËNA PËR PRONARIN PËRFITUES MBI PERSONIN JURIDIK OSHMA PAS NDRYSHIMIT: (vetëm për persona fizikë)

Emër, mbiemër _____
NUIS _____
Adresa: _____
Kontakt: _____

Pjesëmarrja në kapitalin e OSHMA-së: 1) _____ (në %)
2) _____ (në %)
3) _____ (në %)

Lloji i pronësisë: Direkte Indirekte

DEKLARIME TË TJERA NGA PALËT:

Informacion për konflikt interesi të drejtpërdrejtë ose të tërthortë në organizata të tjera ose shoqëri private, në rastet kur kjo ndikon drejtpërdrejtë në ushtrimin e veprimtarisë audio/audiovizive

Po (Nëse po, lutemi specifikoni më poshtë)

Jo

Faqe | 12

(Vendndodhja), më _____ (data) _____

(hapësirë për vulën)

(emër, mbiemër)

Administratori